

‘GERNIKA DEIALDIA’. Hurrengo asteetarako antolatutako ekimenak aurkeztu zituzten atzo Iruñean egindako agerraldian

Haritz kimuak landatuko dituzte Euskal Herriko sei toki sinbolikotan

Ilbeltzaren 19an izango da ekimena sei herrialdetan, ‘Gernika Deialdiak’ antolatuta

Irene Arrizurieta | IRUÑEA

Gernikatik Euskal Herrira leloa duen ekimeneko bultzatzaileek ilbeltzaren 19rako Arabako, Bizkaiko, Gipuzkoako, Nafarroako, Lapurdiko eta Zuberoako toki esanguratsuetan haritzak landatzea antolatu dute. Landatzearekin Euskal Herriko eskubideen aldeko ekimenak «piztu eta bultzatzen» segitu nahi dute.

«Egonezinetik, desgogotik eta zapalkuntzaren sententzietatik sortutako ekimena da, eta egun zentzu handiagoa du Euskal Herriko eskubideak epaitzen ari direnean», adierazi zien atzo Laura Mintegi idazle bizkaitarrak komunikabideei Iruñean. Mintegi ekimenean parte diren beste sei herrialdetako ordezkariekin batera azaldu zen: Zuberoako Dominique Agerragari, Gipuzkoako Pedro Albite, Arabako Amparo Lasheras eta Nafarroa Behereko Mirentxu Laku. Nafarroa Garaiko ordezkariak ezin izan zuen joan.

Idazle bizkaitarrak gogoratu zuen Gernikatik Euskal Herrira urriaren 19an Gernikako Juntetxean plazaratutako ekimena hasia dela fruituak ematen. Handik hilabetera euskal kulturako eta gizarte eragileetako ehundik gora ordezkariak Euskal Herria «bizi-bizirik» dagoela erakutsi nahi izan zioten munduari, berriro ere, Gernikan. Atzo, Euskal Herriak aspalditik jaso dituen «erasoei erantzuteko», antolatze eta mobilizatzeko deia egin zioten parte-hartzaileek abertzale eta ezker-tiar sentitzen den orori.

Euskal Herria nozitzen ari den «erasoei» Gernikako haritzaren kimu berriak landatuz erantzunen diete. Bizkaiko herrian 1937an jazo zen bonbardaketatik bizirik atera ziren pertsonak emandako haritz kimuak landatuko dituzte Euskal Herriko herrialdeetako toki adierazgarrietan. «Aldarrikatu nahi dugu euskaldun kontzientzia eta izaera dugula. Kimu berri horien transmisioan bizirik dirauen herria garela adierazi nahi dugu. *Gora Euskal Herria* esatean herri baten kontzientzia dugula, herri bat sentitzen garela eta hori aldarrikatu nahi dugula munduan», azpimarratu zuen Mintegik.

Aipatu zuen euskal gizarteko hogeiki sektoretik gora bultzatzen ari direla ekimena: musika-



JAGOBA MANTEROLA / ARGAZKI PRESS

Gernika Deialdia ekimeneko ordezkariak hurrengo asteetako ekintzak aurkeztu zituzten Iruñean atzo.

riak, bertsolariak, kirolariak eta idazleak, besteak beste, eta beste sektore asko euren aldarrikapen propioa prestatzen ari dira.

Sinboloen defentsa Nafarroan

Gernikatik Euskal Herrira leloa duen ekimenaren aterkiaren babespean beste ekimen bat ere antolatu dute ilbeltzaren 25erako Iruñean. UPNren Gobernuak «euskal ikurak erasotzeari» ekin dion garaian, Nafarroako eta Euskal Herriko ikurren defentsa aldarrikatuko dute. Ekitaldia datozen egunetan zehaztuko da.

19AN LANDAKETA

Gernikako haritzaren kimu berriak landatzea

Gernikako haritzetik ateratako kimu berriak landatuko dituzte Euskal Herriko sei herrialdetako toki esanguratsuetan hilaren 19an, eguerdian. Gernikako bonbardaketatik bizirik atera zirenek eskainitako kimuak dira eta bonbardaketan suntsitu ez zuten «askatasuna berriro loratzeko» helburuarekin landatuko dira, ondoko tokietan:

Nafarroan. Baztan bailarako Amaiur herriko monolitoaren aurrean.

Arabian. Gasteizko Zarama auzoko Martxoak 3 plazan.

Bizkaian. Enkarterrietako La Arboledan.

Gipuzkoan. Hernaniko hilerrian.

Lapurdin. Sarako herrian.

Zuberoan. Maulen Matalazen.

Iruñeako UDAL IKASTOLAKO 25. URTEMUGA

EKITALDI EGITARAUAREN
AURKEZPEN MAHAI-INGURUA

EGUNA: 2003ko
URTARRILAREN 9a

TOKIA: EUNATE IKASTETXEA
(Lehenko Kanostarrak)

ORDUA: 18,00etan

PARTAIDEAK: ASPALDIKO
ETA GAURKO GURASOAK,
IRAKASLEAK, LANGILEAK, GARAIO UDAL
ARDURADUNAK, IKASLEAK...

Oiartzungo udalerrian, Oiartzun ibaiko Olaetxeko antaparan ondoz ondoko dikeak eraikitzea (Gakoa: 8-V-44/2002)

2002ko abenduaren 23ko Gipuzkoako Aldizkari Ofizialean, 242 zk.an, OIARTZUNGO UDALERRIAN, OIARTZUN IBAIKO OLAETXEKO ANTAPARAN ONDOZ ONDOKO DIKEAK ERAIKITZEA Proiektua (8-V-44/2002) eta derrigorrez hartu beharreko ondasun eta eskubideak jendaurrean erakusgai jarri direla iragarri da, eta ondasun eta eskubide horien zerrenda zehatza eta banakatua ere ageri da.

Donostia, 2002ko abenduaren 26a



Gipuzkoako Foru Aldundia
Obra Hidraulikoetako eta Hirigintzako Departamentua

BATASUNA

Ilegalizazioak «ahultasuna erakusten du»

Batasuna ilegalizatzeko Auzitegi Gorenean atzo hasi zen prozesuaz ere gogoeta egin zuten. Ilegalizazio prozesua «Euskal Herriak bizi duen egoeraren erakusle» dela adierazi zuen Amparo Las Heras Gernika Deialdiko ordezkariak. «Edozein demokraziatan dauden eskubide politikoak eta zibilak zantpatuz, baliogabetu nahi dira Euskal Herriaren defentsa eta gizarte orekatuago eta bidezkoagoa baten alde egin duten ideiak eta aukera politikoa», salatu zuen. Euskal Herria «gizarte eta herri moduan mapatik kendu nahi» dela gaineratu zuen.

Las Herasen iritziz, ezartzen ari diren murrizketak alperrikakoak izanzen dira. «Ezin gaituzte lege bidez baliogabetu. Dekretuz pertsona batek ezin dio utzi pentsatzeari eta independentziaren alde lan egiteari», esan zuen.

Ekimen bereko Laura Mintegi idazleak ondoko gogoeta egin zuen: «Estatuaren ahultasunaren adierazle da. Bere burua behartuta ikusi du eskura dituen baliabide guztiak: legalak zein ilegalak, polizialak, judizialak zein politikoak behetik gorantz doan indarra gelditzeko». Mintegiren aburuz «eskuetatik joaten ari zaio herri honen indarra. Baliabide guztiak erabilita ere, ez du herri batek bere buruaren jabe izateko nahia gerarazterik», gaineratu zuen.